

冷

廬

雜

識

冷廬雜識卷二目錄

忠義傳

李方叔

扁用成語

鄭太守

義塾聯

卷面題詩

典獄

徐鐵河

典當

蓮衣僧

方正學

張杞山

沈蟾客先生

閔中丞

楊忠武公

程京丞

窮通翁

二宋

徐瘦生

吳石華詞

授經偶筆

顧母

孫文靖公

計學博詩

羅提督

字典

丁掇英先生

倪烈婦

除夕奏凱

魏侍御聯

蜈蚣入腹

食忌

馮中丞

林文忠公

復父讐

諸葛武侯祠堂碑

趙太史

少石公

文選字句

山齋留客圖

醫宗四大家

五月五日生

馮少司寇

顧萊厓

畢大令

錢王祠聯

雪詩

朋友

錫

李梅卿

吳香竺詩

朱綠筠

浙江鄉試錄敘

三續千字文

周禮

改月改年

祖孫父子同名

仲廉甫劄記

醪錢啟

李孝廉

顧侍讀

周孟侯先生

新樂府

孫愈愚

吳香圃詩

關帝說

劉三山

沈鹿坪師

臘

起復

葉素卷

端木舍人

孔子生日

孫瀛帆詩

禱神文

譚嶽

孔孟弟子

名與姓通

允征

同姓名同字

文體相似

有澹臺滅明者

七修類稿

經史數見字

一言

銀頂

俗稱

帥中丞

黃少司馬

小軍機

李方伯

紅豆

楊拙園先生

改姓

梁元帝

一日不見如三月兮

梳銘

舒元興銘

印章隱姓名

張睢陽廟聯

巢居閣

琴銘

沈氏姑

學林

七夕詩

目疾秘方 吐生

冷廬雜識卷二

桐鄉 陸以湑 敬安

忠義傳

盧奕在忠義傳其孫元輔以能紹其祖附焉其子杞乃入奸臣傳得罪於名教雖有賢父令子不能遁其惡也

李方叔

蘇文忠公典貢舉遺李方叔呂大防有失此奇才之歎文忠歿方叔哭之慟且爲相地下兆作文祭之曰皇天后土鑒一生忠義之心名山大川還萬古英靈之氣蓋



其知己之感有不在形迹之末者非若薄俗之士徒以窮達判恩怨也

扁用成語

乾隆間京師武廟製扁某親王邸西席江蘇貢生某擬天子重英豪合

聖意賞六品銜又如倉頡廟題始制文字盤古廟題人之初引用成語皆切當

鄭太守

吾邑鄭漁帆太守心一以名幕起家由佐貳官至袁州

太守因病乞歸卜居蘇州時有故鄉之思題書室聯云  
無可柰何新白髮不如歸去舊青山

義塾聯

杭城義塾立法甚善仁和費辛橋方伯丙章題聯云莫  
謂孤寒多是讀書真種子欲求富貴須從伏案下工夫  
激勵寒畯辭意肫切又許齋生教授題嚴州義塾聯云  
雖非千萬間居然廣廈爲語二三子慎厥初基語亦簡  
貴

卷面題詩

咸豐壬子浙江鄉試第二場山陰某生闌中發狂病曳  
白而出卷面題二絕句云記否花前月下時倚欄偷賦  
定情詩者番新試秋風冷露濕羅鞋君未知黃土叢深  
白骨眠淒涼情事渺秋烟何須更作登科記修到死央  
便是仙歟書山陰胡細娘某生旋卒於寓所輕薄之報  
可不畏歟

### 典獄

道光甲辰夏陝西神木縣民李述秀與族婦李蘇氏有  
私爲族女李春孩所見欲殺之以滅口李蘇氏以鐮柄

毆傷其左右腳腕李述秀以鑱柄入陰戶卽時殞命移屍懸於李春孩之父果園隣人錢述法望見趨問詐稱李春孩罵伊等爲賊起衅致斃事聞於官縣令王致雲據供定讞李蘇氏援鬪毆律擬絞李述秀杖徒贖上巡撫李星沅臬使傅繩勛以李春孩年甫十三有何忿恨致迭毆而傷陰戶屬西安郡守李希曾覆訊始得實情改讞援謀殺律李述秀擬斬李蘇氏擬絞奏聞得旨王致雲褫職李傅李以審訊精詳俱加二級同時有順天通州民婦康王氏之姑康陳氏與姨甥石文平日

角爲石文平毆傷憤懣自縊石文平賄囑康王氏僞稱病故而康王氏之戚王二素與有怨揚言康陳氏之死係康王氏石文平因姦謀斃指揮蕭培長王瑩訪獲審訊康王氏等畏刑誣服迨起棺檢驗適雪後陰晦嚴寒未用糖醋如法罨洗誤認縊痕爲被勒遂以謀殺定讞刑部額外主事楊文定以案多疑實白之堂官請旨覆訊始得實情改讞康王氏以受賄私和石文平以威逼人致死皆問杖流奏聞得

旨蕭培長王瑩承審失入從重發往新疆遇赦不赦楊

文定留心折獄平反得宜卽擢補員外郎二獄皆見邸抄一失出一失入俱訊驗率畧而然可以爲鑒

### 徐鐵海

華亭徐鐵海諤幼時甫入塾卽能辨四聲塾師奇之比長酷好吟詩後以飢驅客游諸侯足述半天下晚年移家清平山下編集爲清平山館詩鈔佳句如雪消山閣寒叉手月到溪橋夜覓詩霜前一雁橫雲路海上諸山落酒杯皆有逸致其六十生朝自述云橐筆生涯百不堪關河萬里走孤驂眼看五嶽曾經四淮南嶽衡山未到手散

千金已過三余自隻身出門及移家武林并內子故後凡有長物寄存戚友處者盡爲毀沒合計  
三次破家而三復之所耗實多梅鶴笑人徒自苦湖山容我不嫌貧也  
知浪蹟非長策直擬西泠結草菴見者可以識其生平  
矣

### 典當

翰林院地望清切而每有空乏之虞宋楊大年請外表  
有云漢臣之餓且欲死難免侏儒之嗤孔徒之病不能  
興敢懷子路之愠行作若敖之餒鬼徒辱甘泉之從官  
近某太史作口號云先裁車馬後裁人裁到師門二兩

銀師門三節兩生日  
惟例餽賀儀銀二兩  
惟有兩餐裁不得一  
回典當一傷  
神艱窘之況情見乎辭矣

蓮衣僧

蓮衣僧量雲楚人少習儒業晚投空門愛西湖之勝棲  
止湧金門外之靈芝寺署所居曰未簫室同年音玉泉  
司馬德布爲題聯云結屋古城下洗鉢清溪傍蓮衣工  
書亦能詩嘗自題其像有快意事教來日少故人墳比  
遠山多之句

方正學



明成祖令方正學草詔正學投筆於地且哭且罵致于  
成祖之怒世或議其激烈已甚方氏望溪亦論其任剛  
而自謂不屈者以聖賢之道衡之正所謂震於卒然而  
失其常度不知其哭罵之時乃正氣所達不能自己顏  
常山舌段太尉笏古人類此者多矣何獨於正學而議  
之善乎明史傳贊曰齊黃方練之儔抱謀國之忠而乏  
制勝之策然其忠憤激發視刀鋸鼎鑊甘之若飴百世  
而下凜凜猶有生氣論斷平允可以息衆喙矣

張杞山

震澤張杞山布衣夢質樸無他嗜好惟喜爲詩著有吟  
雪軒詩彙句如寒雲沈浦雁暮雨入江湖亂紅霜後葉  
一碧水中烟閑九日同人游荻塘云登臨休悵是他鄉  
秋老林臯野菊黃今日招邀須盡興百年幾度兩重陽  
山塘雜詠云白紵清歌風擅場至今水調聽吳娘瀟瀟  
暮雨紅橋外不是離人也斷腸雅有石湖風味

沈蟾客先生

嘉興沈蟾客先生攀桂同年石菴孝廉養和之尊人也  
喜行善事以郡城南北官塘圯沒時時溺人乃倡捐修

築躬自監督不辭勞瘁自嘉慶己卯至道光壬辰塘路  
百二十餘里皆陸續修固賦詩紀事有問津不唱公無  
渡百里湖山指點中之句

閔中丞

歸安閔峙庭中丞鶚元九歲時其外舅尙書毛公於元  
宵宴客中丞以舊姻與焉公作對屬客曰元宵不見月  
點幾盞燈爲河山生色是日適屆驚蟄中丞卽對曰驚  
蟄未聞雷擊數聲鼓代天地宣威公大稱賞遂以女妻  
之

楊忠武公

近世名將以崇慶楊忠武公遇春爲第一才勇旣偉知  
遇亦隆由固原提督遷陝甘總督武臣授文職曠典也  
公髯長三尺許經大小二百八十餘戰無不身當先未  
嘗受創平張格爾凱旋兵初過州縣橫甚毆知縣報聞  
反見責公意不謂然比至樞責帶兵官各四十受責者  
五十餘人斬毆官者以徇兵後不敢譁在固原任二十  
餘年每營簡練精壯三百名以擡礮列前繼以鳥鎗十  
人一長習進步連環鎗以次弓箭刀矛噴筒火彈層層

護之用馬隊翼於左右署其名曰速戰陣天下稱勁旅焉

程京丞

吾邑程春廬京丞同文少負異質湛深於古嘗讀書吾里分水書院戲題於几曰胸中無所不有一事未能到手儒林名宦山林待我四十年後嘉慶己未登第由兵曹入樞垣一時典冊皆出其手名望隆起方將大用遽卒士論惜之

窮通翁

太倉王相國揆之督學浙江也取士公明人有窮通翁之謠言所取皆寒士宿學而能文者也後湖北李某來督浙學不喜典重文字好取短篇士之美秀者拔置前列貌不揚者雖已入彀必摘其文中疵累黜之時有謠云文宜淺淡乾枯短人忌鬍麻胖黑長

## 二宋

陔餘叢考謂有三二宋指宋史宋琪宋雄宋郊宋祁元史宋本宋駿也余按元史宋子貞與族兄知柔人稱大宋小宋明史宋克宋廣善書稱二宋又

本朝長洲宋旣庭教諭實穎與宗弟疇三俱以孝廉知名時稱大宋小宋道光癸卯浙江鄉試臨海宋衛宋瑱以同祖兄弟同舉孝廉其同年亦以二宋稱之

徐瘦生

吾里徐瘦生茂才照工書喜爲詩家貧授徒自給中年後絕意進取課讀之暇兀坐高吟怡然自得嘗題聯齋壁云志不求榮滿架圖書成小隱身難近俗一庭風月伴孤吟詩藁甚富歿後皆散佚無存

吳石華詞

嘉應吳石華學博蘭修酷好倚聲所著桐花閣詞清空  
婉約情味俱勝可稱嶺南詞家巨擘錄其尤者於左菩  
薩蠻云愁蟲瑣碎啼金井離人漸覺秋衾冷一味做淒  
涼夢魂都不雙 當年相戀意萬種心頭記酒醒一燈  
昏更長細細溫廉州七夕寄內虞美人云一年又到穿  
針節樓角纖纖月素馨棚外倚欄杆最憶二分風露玉  
斂寒 人間無限銀河水相隔長千里九回今夕在天  
涯只有心頭夢裏不離家梁子春梅屬題春堂藏書圖  
乳燕飛云一夕酸心話問平生說猶未忍那堪圖畫阿



母昔兼師與父儲取縹緗滿架將舊日釵鈿都捨一盞  
寒燈親口授有縑車伴盡啼烏夜衣絮冷寺鍾打而  
今回首悲親舍哭秋風樹根讀竟淚泔泔下賸有緇帷  
常入夢猶侍殘機未罷筭此種深恩誰寫任說馬周當  
富貴痛泉臺何處頻封鮮我亦是傷心者學博嘗謂嶺  
嶠精華之氣荔支得其七八如敝鄉者桃又得其一二蘭  
輩數十人共得其一耳

授經偶筆

嘉興錢新梧給諫儀吉官京師無力延師教子與其室

陳煒卿女史爾士親自督課女史嘗於講貫之暇推闡  
經旨著授經偶筆以訓子女內則執麻枲治絲繭織紵  
組紃學女事以其衣服說云古者婦功在於麻枲絲繭  
織紵組紃其成也質實堅重而可以爲久後世乃以刺  
繡爲工輕而易敗朝爲被服之華夕同土苴之棄耗力  
費財甚無謂也古者黼黻文章以奉朝祭此廟而不宴  
者也今俗尙侈靡婦女履底或有繡文是古昔祭服之  
飾今緣之履底矣又若繡衫繡扇充溢吳市敝化奢麗  
視若尋常賈生所謂天下不屈者殆未有也其言切中

習俗之弊

顧母

顧亭林先生之母王氏崇禎時旌表節孝卽明史列女傳所稱王貞女也先生有與葉訢菴書辭薦舉云先妣國亡絕粒以女子而蹈首陽之烈臨終遺命有無仕異代之言載於誌狀故人人可出而炎武必不可出矣記曰將貽父母令名必果將貽父母羞辱必不果七十老翁何所求正欠一死若必相逼則以身殉之矣一死而先妣之大節愈彰於天下使不類之子得附以成名此

亦人生難得之遭逢也蓋其辭決而其志彌可哀矣

孫文靖公

無錫孫文靖公爾準以翰林起家出知府歷官闕浙總督興利除弊懋著勛能乾隆戊申應北闕試報罷有贈黃炳奎詩云昨朝銀榜揭天門姓名填原知誰某男兒立身有本末何物料名堪不朽又已未歲禮闈報罷作三十自壽詞云但說文章堪報國恐蒼蒼未盡生才意識者早決爲大用之器

計學博詩

秀水計壽橋學博楠崇尙風雅兼精於醫著有一隅草  
堂詩集句如黃葉覆松徑寒泉鳴竹林風多秋在樹人  
靜月當門才非有用窮何怨性本多情老愈深貪閒轉  
覺離家好多用先愁卒歲難楊柳東風來海燕桃花春  
水上河豚皆妙

羅提督

東鄉羅提督思舉戰功見於魏默深州牧源聖武記者  
詳矣偶閱富陽周芸臯觀察凱所述逸事其智能亦自  
可稱非徒以武力雄一時也公嘗率兵入南山搜餘賊

村人苦猴羣盜食田糧晨必發火器驚之公問故令獲一猴來薙其毛畫面爲大眼諸醜怪狀銜其口明晨俟羣猴來縱之去皆驚走猴故其羣也急相逐益驚越山數十重後不復至官夔州游擊薊關臨峽山水迅急瞬息千里鹽梟及販鬻人口者至則鳴金叫呼越關以過船皆設礮械兩旁繫大竹彎如弓他船追及斷繫發之船必覆人莫敢櫻公募善泅者持利鋸匿上流水中俟船過附而鋸其舵抵關適斷船不能行觸石破盡獲之又有一巨惡某唆訟守欲得之以屬公公佯不悅曰是文官

事何語我夜踰垣入其室見爲草狀及橐匿所出使數人候門外復入起局人橐俱獲曰昨所以不許者彼耳目衆欲令不爲備也

### 字典

字典十二集二百十四部旁及備考補遺合四萬七千

三十五字

古文字一千九百九十五不在此數

韻府四聲一百六韻合一

萬二百五十七字

上平聲二千二百七下平聲二千一百十三上聲一千八百四十四去聲

二千二百九十六入聲一千七百九十七

祇及字典四分之一而世俗通行

所識之字不過四千有餘僅十分之一耳

丁掇英先生

有里丁掇英先生元采

歸安籍

先伯父石公鄉舉同年

也刻苦好學尤耽楷書生平書殿試卷不下二千本十  
上公車不第賦詩誌感云十度長安客途窮眼執青風  
塵徒自苦文字竟無靈對鏡悲雙鬢挑燈伴一經故交  
揮淚別從此老林垌後司鐸秀水二十年乃告歸卒於  
家先生與石公投分最密遂訂兒女姻

長子盧谷學博仁咸為

石公長壻石公罷官後羈寓甘肅寄先生書備述升沈之  
感謹錄於左白別履綦屢更寒暑每因去雁思作報章



而憂從中來操翰復輟今者一官再躋萬念皆灰帳設  
扶風門稀立雪酌魯酒而薄醉聽秦聲而寡歡奇愁塞  
胸抑鬱誰語竊願爲閣下陳之僕賦命多窮性復寡斷  
當丙寅歲微罪去官片帆歸里卽能名心永息故業重  
溫成茂先勵志之詩著虞溥勸學之詰束脩之羊時至  
問字之酒頻來則雖不能如仲長統之樂志邱園向子  
平之畢願婚嫁而蒙來求我熱不因人怡怡然無所得  
失也而乃貧猶乞郡老更離家典杜陵之衣書孟嘗之  
券技窮鼯鼠蹟類羝羊以致遠道間關頻年奔走積勞

成疾望遠難歸迫至計無復之而悔已晚矣猶謂塵勞  
已倦仕籍猶存雖西笑之自慙或東隅之可補不意驚  
波復起鍛翮重遭當宦轍之初停忽官階之遽去元冬  
垂盡邊地苦寒聽簫鼓而心驚睨刀環而目斷蕭寥卒  
歲侘傺回車何爲而來破涕成笑二月中行抵長安幸  
賴董觀橋中丞憫窮鳥之投懷拯枯魚於涸轍薦主同  
州講席始得暫爲枝借免作蓬飄然已精力俱疲神魂  
欲竄每當天寒日暮月冷風淒一燈熒熒獨與影語幾  
不知此身之猶在人世也或者謂羌村杜老終遂生還

窮海坡公虛傳死信苟年華之未邁豈歸計之難成不  
知松菊全荒終當乞食樵蘇不爨何以爲家倘使憔悴  
還鄉啼號舉室青裙病婦貧無沽酒之釵白雪嬌兒寒  
索然糠之火乞數升而未得米市價高懷一刺以空投  
侯門終絕劉伯龍徒爲鬼笑阮嗣宗莫救途窮而且家  
少薄田縱乏催租之吏客持舊券還須避債之臺呼負  
負兮誰憐抱區區而莫訴斯時也卽房中奏曲亦作秋  
聲膝下含飴都無甘味矣又何如飛鴻印雪一任留痕  
落葉打包長爲行腳也哉嗟乎試看白髮已逼殘年不

及黃泉更無歸路興言及此涕泗交頤想閣下聞之亦  
必爲之撫膺三歎也韶春餘閨晝景方長閣下作明山  
賓之學官坐元行沖之講席酒材分致菜把生香官不  
勞形夢亦成趣君誠樂矣僕有憾焉憶丁未歲與君同  
赴大挑君乃薄外吏而不爲僕則得冷官而復失與羣  
無分皓首徒悲緬想曩時祇以在蜀時曾有奉懷  
句云宦海無波只此官由今思之斯言益信端函削牘  
聊布夙心愁人之言動多激楚伏惟鑒察不盡依馳

倪烈婦

倪烈婦仁和王通甫女也年十七嫁東里倪德昌三月而寡謹事舅姑不衰閱八年舅姑以家貧欲嫁之陰納聘行有期矣先一日乃告之婦佯諾卽晚檢半臂一耳環一以與姑曰是猶足爲數日養夜半投於河遲明父至述夫婦同夢女歸以死告且謂上帝命爲河神無苦也方其駭愕里中譁傳太平橋河有屍被髮蒙面上下衣密縫視之則婦也凡溺者男覆女仰而婦屍獨覆人莫不異之此道光八年四月事也九年

詔旌其門里人爲葬於棲霞山下趙茂才之琛題其華

表云碧水冷銀瓶祠近岳家追孝媛青山標石碣墓隣  
孫氏聚貞魂

除夕奏凱

逆回張格爾背叛四城失陷

宣宗成皇帝命大學士長齡爲揚威將軍統兵征勦四  
城收復張逆潛逃至噶爾鐵蓋山爲兵丁揚發田大武  
所擒其時爲道光丁亥除夕將軍馳奏凱音有句云開  
九重之間闔歡傳 鳳閣椒花聽萬里之鑣歌 喜溢  
鰲山燈火銀旛綵勝祥光爭耀於紅旂玉燭金甌瑞氣

常凝於紫陞切時令抒詞非比尋常稱頌先是克復四城時張逆潛逃有議請割棄四城者有議屠戮叛衆者將軍以四城失守援兵未至半多逼脅良莠難分誅之不勝誅且出卡卽外夷部落脫使羣起疑懼鋌而走險爲張逆添羽翼與四城爲勁敵矣於是脅從出卡眷屬得免緣坐竟藉以勾攝張逆入卡就擒人莫不服籌畫之善

魏侍御聯

天竺白衣送子觀音殿楹聯甚多皆庸淺不足道惟錢

塘魏春松侍御成憲所題裁對自然不失讀書人吐屬  
句云白衣仙人瓶中水楊柳朱帶男子天上石麒麟

### 蜈蚣入腹

明張冲虛吳縣人善醫有道人以竹筒就竈吹火誤吸  
蜈蚣入腹痛不可忍張碎雞子數枚令啜其白良久痛  
少定索生油與噉遂大吐雞子與蜈蚣纏束而下蓋二  
物氣類相制入腹則合爲一也事見吳縣志按明江氏  
璣名醫類案亦有一方云取小豬兒一箇切斷喉取血  
令其人頓飲之須臾灌以生油一口其蜈蚣滾在血中



吐出繼與雄黃細研水調服愈南方多蜈蚣且家家用竹筒吹火嘗有是患錄之

食忌

醫書所載食忌有無藥可解者錄以示戒炒症腹痛誤

服生薑湯 疔瘡誤服火麻花 骨蒸似怯症誤服生

地黃 青筋脹 即烏痧脹 誤認爲陰症投藥 渴極思水誤

飲花瓶內水 鹽肉荊芥同食 茅檐水滴肉上食之

食三足鼈 脩饌過荆林食之 老雞食百足蟲有

毒誤食之 蛇虺涎毒暗入飲饌食之

馮中丞

吾邑馮柯堂中丞鈐厯官楚皖有惠政撫皖時於後圃  
薜梅及蔬果顏曰菜根香題楹帖云爲恤民艱看菜色  
欲知宦况問梅花誦之可想見其志趣

林文忠公

林文忠公在河工時題所居室聯云春從天上至水由  
地中行題客座聯云蘆中人出河上公來又贈河丞張  
姓者聯云乘槎直到牽牛渚載筆同游放鶴亭切地切  
姓人咸歎其工妙

復父讐

唐以前復父讐不抵死者多至唐始有抵死者憲宗時梁悅復父讐職方員外郎韓愈議復讐之名同而其事各異有復父讐者事發具其事下尚書省集議以聞酌處之有詔以悅申寃請罪詣公門流循州自後多得減死然猶不免於戍如明之何競張震皆然至

本朝蓬萊王孝子之復父讐竟得開釋復功名則以典獄者賢能體

聖天子孝治天下之意也其讞詞推原律意尤足以維

國憲而厭人心全謝山太史祖望作王孝子傳載其事  
甚詳茲畧述之王孝子名恩榮父永泰因實產與縣小  
吏尹奇強角口被毆中要害死時恩榮甫九歲祖母劉  
氏訟之官不得直僅給埋葬銀十兩祖母內傷自縊死  
母劉氏瘞其姑藁厝永泰棺於市僦屋其旁居之泣血  
三年病甚將死授恩榮以官所給銀曰汝家以三喪易  
此恨不可忘也恩榮泣惟大事家盡落依舅以居厲志  
讀書稍長補諸生誓於父柩前尋仇以弁自隨其舅諭  
之曰豎子之志固當但殺人者死是國法也爾父之鬼

餒矣恩榮流涕聽命年二十八舉子辭於舅曰可矣遂  
行兩次遇奇強斫以斧不死脫去遠遁棲霞相隔八年  
奇強偶返蓬萊入城過小巷恩榮突出扼之劈其腦腦  
裂以足連蹴其心而絕恩榮乃自繫赴縣會奇強家訟  
當日永泰故自縊非毆死縣令欲開棺驗視恩榮請曰  
小人已有子矣甯抵死不忍暴父骸以受毀折叩頭出  
血縣令惻然乃爲博問於介衆皆曰恩榮言是遂巡詳  
法司法司議曰古律無復仇之文然查今律有殺擅行  
凶人者子杖六十其卽時殺死者不論是未嘗不教人

復仇也恩榮父死之年尙未成童其後疊殺不遂雖非  
卽猶卽矣况其視死如飴激烈之氣有足嘉者相應特  
予開釋復其諸生卽以原貯埋葬銀還給尹氏以章其  
孝時康熙己丑年也位恩榮事者撫軍則中吳蔣陳錫  
提學則北平黃侍講叔琳與滇南李觀察發甲也余按  
唐李肇國史補云衢州余長安父叔二人爲同郡方全  
所殺長安復讐大理斷死刺史元錫奏言臣伏見余氏  
一家遭橫禍死者實二平人蒙顯戮者乃一孝子請下  
百僚集議其可否詞甚哀切時裴垺當國李鄘司刑事

竟不行老儒薛伯高遺錫書曰大司寇是俗吏執政柄  
乃小生余氏子宜其死矣以下孝子事相較非今之遠  
勝於古耶康熙己未烏程有嚴孝子廷瓚復父讐詣縣  
自首縣令欲生之爲請於上司方侯督撫具題而孝子  
已死於獄蓋爲讐家賄獄吏殺之也牧民者鑒此益當  
加意致慎矣

諸葛武侯祠堂碑

蜀丞相諸葛武侯祠堂碑余於武林帖肆得之乃明蜀  
府丞秦騰高所鐫補者碑高八尺闊二尺九寸字廿一

行行五十字首行題節度掌書記侍御史內供奉賜緋  
魚袋裴度撰營田副史檢校尚書吏部郎中兼成都少  
尹侍御史賜紫金魚袋柳公綽書末行題元和四年歲  
次己丑二月十九日建首行空處有宏治十年巡按四  
川監察御史藍田榮華跋錢宮詹金石文跋  
尾作巡撫者誤其下滕嵩  
跋語殘缺不見鐫補年月惟有由唐逮今將盈千載語  
當在有明中葉以後末行空處有康熙十一年巡撫羅  
森跋諸跋語俱有剝落處碑文上一二格下四格亦然惟  
末行年月以下粵東藩使膠西宋可發跋楚楚可誦云



讀唐碑文瑰麗書端嚴稱雙絕匪溢當時不以文字推  
裴柳重本也文傳者文重人傳者文亦重彬彬君子哉  
碑文以唐文粹校之微不同如震懾之懾作疊謀久駐  
之計謀作爲上下無異辭上字前多一而字志願未果  
作日日未果尙皆無可指摘至荊州之荊作故罷眈之  
眈作眈於義未安若是筆誤則以之上石何草草耶米  
元章謂柳尙書字勝其弟誠懸今觀此碑筆力柔靡遠  
不逮矣豈因重鑄而失真歟

趙太史

乾隆乙未科會試奉新趙太史敬襄卷爲房考白麟閱薦三藝已刊擬第四名總裁以前十名試卷例應進呈重加校勘見趙卷第五策用大厯字白以爲己改寫作厯不爲犯諱總裁嵇文恭公獨以爲不可白爭之甚力文恭疑愈深卒擯棄之於是取中在後之卷策中用慶厯萬厯等字者皆斥之自後科場禁例除閱厯字照常書寫外其本字係指天文者雖經改寫而古字本通試卷內必宜敬避蓋文恭弱冠登朝畏慎無過失獨嘗於進呈文字內有引

御製詩用字未經改寫者坐是出 南書房故生平遇

廟諱

御名倍深敬畏然宋制尙避嫌名則古字本通之字自宜謹避也趙於庚寅科以十五歲登賢書自是踳踳公車者二十餘年至嘉慶己未科始以第三名登第入詞林改吏部主事未及半年卽乞歸授徒二十餘年而卒著有竹岡齋集

多石公

伯父多石公歷官郡守清而不刻初抵惠州府任歸善

縣學博甘某年已八旬龍鍾叩謁耳又龔應對俱謬或  
諷可以年老黜之公曰士人畢世勤劬僅得備位下曹  
已足憐憫況學博乃老而後官非官而後老何忍苛求  
乎卒善視之迨公移任高州甘卽登白簡公自幼刻苦  
力學於詩嗜之尤篤晚年自定青芙蓉閣詩集六卷海  
內傳誦之嘉慶己卯歲星查從兄瀚攝篆徐聞縣公得  
信作詩勗云南天遙隔海漫漫書到都從隔歲看道遠  
忽如遷客去身親方信宦途難刑書未讀猶儒術民隱  
能知卽好官載石鬱林先德在莫因寶玉厭貧寒詩不

載集中蓋絕筆也公卽於是歲捐館知交輓章極多同  
邑孔梧鄉學博廣覃題聯云典郡矢清廉歸裝片石論  
詩重忠孝大集千秋語最警切

文選字句

嘉慶間場屋中式文字習用文選字句往往有訛妄不  
通者如垂衣裳而天下治題文用東都賦盛三雍之上  
儀一段不知雍宮建自漢朝黃帝堯舜時無之且賦語  
云盛三雍之上儀修文龍之法服鋪鴻藻信景鑠揚世  
廟正雅樂而文中抄用因坊本注釋服字下有音二字

遂誤以爲正文書作錯鋪鴻藻信景鏐揚而截去世廟  
正雅樂五字割裂紕繆真堪發噱見給事中辛從益所  
陳條奏中

### 山齋留客圖

道光己亥余選台郡教授廨近闌闔棧棟多傾而地勢  
宏敞西南諸山列戶外余稍稍葺治隙地皆補以花叢  
香滿室每與二三佳客清言竟日幾忘身在城市爰作  
山齋留客圖并賦詩以寄興云空齋閉門居閒散伍丞  
掾經世愧無術幸愜庭闈戀廊廡日清曠一瓊此安宴

迤邐城外山濃翠撲人面烟雲莽終古倏忽狀萬變於  
斯悟塵幻榮利又奚羨願偕素心侶撫景恣笑拚情真  
略形迹俯仰任所便品題各揮毫秀綠入吟卷回睇階  
下花深叢正摘絢 浮生役萬事形悴神亦傷豈如適  
我性優游飫衆香韶春淑氣轉繁英媚晴光花開雜五  
色軒檻列成行佳客抱琴至角巾共倘佯客至不常聚  
花開不恆芳見花復見客曷不盡百觴酒罷樂未已攬  
衣舞回翔江湖多風波吾黨興自狂淹留日旣夕月華  
吐遙岡

## 醫宗四大家

新安羅養齋浩醫經餘論云醫宗四大家之說起於明代謂張劉李朱也李士材輩指張爲仲景不知仲景乃醫中之聖非後賢所及況時代不同安得並列所謂張者蓋指子和也觀丹溪脈因症治遇一症必首列河間戴人東垣之說餘無所及其斷症立方亦皆不外是知丹溪意中專以三家爲重格致餘論著補陰之理正發三家所未發由是攻邪則劉張堪宗培養則李朱已盡皆能不依傍前人各舒己見且同係金元間人四大家



之稱由是而得耳此說足以正數百年相傳之訛

五月五日生

俗忌五月五日生然史書所載如孟嘗君胡廣張桓侯  
飛王鳳王鎮惡齊後主齊南陽王綽崔信明宋徽宗翁  
應龍紀邁遼懿德皇后趙元昊等其遭遇不同最奇者  
田特秀以五月五日生小字五兒所居里名半十行第  
五二十五歲鄉府省御四試皆第五年五十五八月十  
五日卒見金史

馮少司寇

臨海馮蒿菴少司寇甦康熙己未殿試充讀卷官事畢  
賜茶乾清宮

命與同列賦詩馮詩先成有還看景運息戈鉦句

上諭鉦韵稍生險韵排律用之不妨律詩似宜他擇卽  
面奏改定有鄒枚俱視草還看房魏豔凌烟云云

上首肯稱善施愚山侍講爲賦詩云受詔近傳新句好  
親承

天語與深論朝士豔傳之馮工於七律如歸舟雜興云  
北望雲山燕市遠南來舟楫楚程多寒食雜詩云兒女

燈前同是客園林枕上幾還家俱佳

顧棗厓

吾郡石門顧棗厓修性嗜吟詠兼善丹青遷居吾邑築  
讀畫齋繪圖以見志有曾留機緣常開徑祇愛丹青不  
買山之句與歛鮑棗飲孝廉廷博交好亦喜刊書有讀  
畫齋叢書行世

畢大令

文登畢恬谿大令以田精研古訓嘗謂宋儒好鑿空以  
俗訓訓古經其尤甚者自春秋至唐書策所載皆子糾

兄而桓公弟顧於千載下意變其長幼以伸已議識者  
遽之年七十以舉人大挑一等分發江西委署安義值  
赦令邑有兄殺胞弟之案大令列之不準援赦上游駁  
斥大令執不念鞠子哀泯亂倫彝刑茲無赦之經義以  
諍之大府已定劾休適歛程春海侍郎恩澤主試廣東  
取道豫章大府歛之侍郎問大令起居甚悉事乃得解  
嗣補崇義卒官著有九水山房文存二卷楊至堂河督  
刊行於世

錢王祠聯

杭州錢武肅王祠在湧金門外規制宏敞有王文成公題扁云順天者存楹聯則有諸城劉文清公牖題云啓匣尙存歸國詔解豈時拂射潮弓又孫文靖公題云衣錦還鄉保萬民於安樂上疏歸國啓百世之蒸嘗又裔孫嘉定伯瑜中丞寶琛題云功在生民惜傳聞異辭信史尙留曲筆德垂奕禩悵播遷中葉支流莫溯淵源

雪詩

道光辛丑十一月吾鄉大雪高積丈許壓圯屋宇傷人甚多時余司鐸台州台地少雪是歲雪亦有數尺同人

用坡公北臺書壁韻作詩哀然成集錄其尤者於此同  
雲釀出六花纖一陣惺鬆一陣嚴密慘漸飄風外絮薄  
融初著水中鹽積三尺厚封苔徑添一分光映畫檐無  
限好山排几案霎時失卻舊青尖

臨海洪裕卦

漫空六

出舞穠纖侵曉寒尤較夜嚴花發庭前皆白玉霞飛嶺  
上誤紅鹽迴風態擅三春絮奪月光凝萬戶檐好沁詩  
脾嚼梅蕊冷香透澈齒牙尖

仁和鍾茂才憲堯

聲靜簷

鈴不觸鴉霏霏玉屑碾雲車冰紋凍折垂頭竹粉本新  
翻沒骨花驢背一鞭人覓句馬蹄千里客思家夜深檢

點刪餘草塗抹淋漓墨瀋

錢塘陳茂才景曾

不待月

來明畫閣作迴風舞觸雕檐

陽湖貢茂才雲錦

圍爐嘯

詠冰裁句比戶歡呼玉積檐

仁和馮茂才煦

開徑鴻留

雙爪印迎門鶴舞一身花

臨海張明經英元

余亦有作

云園亭凍影噤啼鴉門外沈沈少客車大地湖山開淨

域諸天色相幻空花僵眠夢冷高人宅禁體詩嚴學士

家試向梅枝問消息滿林香簇玉丫叉

### 朋友

太倉陸桴亭先生世儀思辨錄有云朋友之功可以配

天何者君子能著書不能使之傳世惟天能使之傳世  
然天亦不能使之傳世讀其書而心好之者能使之傳  
世故曰朋友之功可以配天子雲太元曾何足云然微  
桓譚則幾不傳而況不爲子雲者乎乃讀書而心好之  
者不可得甚至有嫉其書而惟恐其傳者朋友之害又  
可以配兵火其論至奇亦至確

錫

臨海洪僉事若臯南沙文集謂方書金銀玉石銅鐵俱  
可入湯藥惟錫不入間用鉛粉亦與錫異錫白而鉛黑



且須鍛作丹粉用之明名醫戴元禮嘗至京聞一醫家  
術甚高治病輒效親往觀之見其迎求溢戶酬應不暇  
偶一求藥者既去追而告之曰臨煎時加錫一塊元禮  
心異之叩其故曰此古方爾殊不知古方乃錫字錫卽  
今糯米所煎糖也嗟乎今之庸醫妄謂熟諳古方大抵  
皆不辨錫錫類耳余謂今之庸醫不特未識古方也卽  
尋常藥品亦不能辨其名有書新會皮作會皮蓋不知  
新會是地名也有書撫芎作撫川芎蓋不知川與撫爲  
二地也此皆余所目見者

李梅卿

嘉興馮柳東教授登府之室李梅卿女史晚早嫺翰墨  
倡隨靜好盛年俎謝教授深悼之女史尤工詞自題倚  
梅圖有雪影壓殘鳥夢月痕冷靠花身之句其寒夜南  
柯子云細點瓜蘆譜閒栽蕙草花三年爲婦慣貧家且  
喜蘆簾紙閣手同爇 獸火溫簫局蛾燈罷紡車戲他  
小女綰雙丫嬾放鉏針今夜較寒些歿後教授題城頭  
月詞於後云唐詩一卷曾親授紅豆雙聲就簫局偎寒  
紡車絮雨夢也休回首 蘆簾十載爲新婦草草分離

蘇寫韻樓空橫琴月冷總是斷腸候

吳香竺詩

吾郡石門吳香竺大令文照嗜吟詠有句云一官如獨  
客萬事付閒吟嘗賦移居秀州傾脂河詩云橋迺夾岸  
有人家一半簾櫳綠樹遮慣飲傾脂河畔水生成兒女  
盡如花人咸稱誦之

朱綠筠

錢塘朱綠筠女史璘聰慧能文矢志不嫁當代聞人欲  
見一面不可得家貧售詩畫以自給余曾見其扇頭畫

菊題詩云無花開爾後風雨已重陽醒卻繁華夢甘爲  
冷淡妝有心難向日無骨不凌霜底事翩躚蝶猶思挹  
晚香是真能孤芳自賞者

### 浙江鄉試錄敘

明萬厯初年各省鄉試皆由外吏巡按等官主文柄自  
十三年乙酉科始遣京朝官臨校浙江正考官則爲無  
錫孫宗伯繼臯副之者爲刑科右給事中江夏常居敬  
監臨爲巡按御史王世揚提調爲左布政使衷貞吉右  
布政使余一龍監試爲按察使馮時雨副使史繼志同

考試官爲推官王守素知縣周孔教學正黃宏敷教諭  
楊啟新林岳偉倪思益杜方偉劉懷民廖自伸訓導陸  
策合提學僉事蘇濬所選士三千七百有奇取九十人  
見宗伯所作浙江鄉試錄敘

三續千字文

宋長洲侍其良器曜作續千字文不用周興嗣千文中  
字江陰葛氏剛正又作三續千字文亦無複字并自注  
萬四千餘言篇末云梁韻昔敘睟編今錄申浦葛叟昭  
勲族胄七略旁覽三篇繼就俱詮詁註俾誨警幼序諱

卷末聊示悠久昭勲句蓋指其伯祖丞相文定公邈理宗時繪像昭勲崇德之閣剛正在從孫之列故曰族冑云

周禮

周禮之制王莽用之而敗王安石用之而亦敗方正學一代偉人乃以用周官更易制度無濟實事爲燕王藉口無他古與今異勢不可強以所難行也禮時爲大信夫

改月改年

武后改十一月爲正月十二月爲臘月來歲正月爲一月自天授元年至久視元年凡十一年元宗改年爲載自天寶三載至肅宗至德二載凡十四年法令不能行久遠亦何事變更爲

### 祖孫父子同名

魏安同之父子皆名屈是祖孫同名也漢彊侯留章復其子又名復廣平節侯德其嗣侯亦名德宋林邑王父子名楊邁羅處士父子名靖元楊文振子名文修明劉忠武父子名江是父子同名也漢劉繇父名興長子基

字敬輿是以祖之名爲字也吳越錢文穆王名元瓘子忠獻王佐字元祐是以父之名爲字也

仲廉甫劄記

仲廉甫劄記太倉馮偉人偉著中多論學之語有云孔子好言仁孟子好言義其旨一也仁以心之離合言義以事之是非言故不處不去孟子之所謂義而孔子謂之仁殺身成仁孔子謂之仁而孟子謂之取義尊德性之學與道問學之學旨亦如此博學而篤志切問而近思仁在其中矣道問學之所以存心也動靜不失其時



其道光明尊德性之所以致知也後世互相砢擊各持一是而不可通豈非意在門戶而心得之實轉荒乎此說可以破朱陸異同之見至謂太虛刻刻在前而人不見見之而不能師之能師之者神聖仙佛也師之則與太虛同壽矣人能以太虛爲師安得以異氏目之是欲合儒釋老之教而混之毋乃言之失當乎

醵錢啟

同邑沈芝岩茂才逢源天才亮特爲督學山陽汪文端公廷珍所賞拔少訂姻於張氏家貧力學銳志進取誓

不登科不娶年逾三十猶未售親戚勸其畢姻爲似續計而孑然一身家無擔石乃爲醵錢以成婚焉旣屢不得志於有司益縱於酒每當夜深人靜持杯獨酌狂呼慟哭輒驚其四隣遂以是得病卒年三十有六無子遺橐散失錄其醵錢啟云伏以納幣無過五兩判於周官有財振人八廚茂於漢紀謝公移帳助隱之爲周旋僕射營婚致子琮無暇日蓋合獨以時者禮也假人不德者義也自來逸軌多載前聞源東髮受經早諳昏義弱冠弄翰間肄閨辭慕鮑宣之風流企何曾之酬酢素門

合牀訂兩小於朱絲張姓連天繫一紗於玉臂固已姻  
聯白建喜得勝流緣合老人卽期報板矣然以爲情繫  
兒女懼累英雄肘繫香囊恐妨書史求凰有曲不驚在  
御之聲特雉無媒未設早婚之令以故涼宵弋鴈星刺  
匏瓜春社飛鴛風虛少女乃者仲卿龍具京師棄其無  
才昭諫白衣雲英笑其未脫十年不字負此韶華三星  
在天歌殘邂逅厯姹紫嫣紅之候春事已闌開口脂面  
藥之頒癡情漸悔滿身風露識季迪之欲婚一闌朝飛  
笑牧子爲未達夢已徵於桑下曲待奏夫房中所慮嫌

練繭紬難捐嘉飾方櫟半燭不少門財在戴良有布被  
之將亦希高隱而裴航無杵臼之聘終隔仙源庫乏男  
錢瞿乾女酒蓋幾幾乎泥中有絮春風徒吹洞口無桃  
胡麻空熟矣於是草元弟子戴笠故人將使鳧不單行  
心成一秣集千狐之腋暖到鴛幃分一葉之陰春回鸞  
樹烏璫十事不令貽笑純材玉鏡一枚卽可相攸溫嶠  
是則長源迎婦供帳徧於北軍寧戚欲妻平章待夫管  
子阮修婚費斂自名流黃姑聘錢貫從天帝以今擬古  
足可軒渠故乃灑墨管城命詞側理杼子結約告爾苔

岑類臬卿索花粉之需異吳市競金錢之擲行見兩行  
花燭悉有耀之自他一色祿紗等解衣之惠我有情誰  
能遣此且慰目前介特之心此事使卿有功預防他日  
擲掄之語

### 李孝廉

嘉邑李孝廉貽德深於經學兼工詩文辭嘉慶戊寅歲  
登科年已五旬矣留京十載不歸其同年某卒於京邸  
因賦詩云故鬼未還新鬼續憐人猶自戀長安未幾亦  
卒聞者悲之

顧侍讀

仁和繆蓮仙良編刻文章游戲類皆娛情肆志之辭惟  
長洲顧耕石侍讀元熙二賦命意高遠非等尋常筆墨  
汙卮賦序云晉傅咸汙卮賦謂卮爲小兒竊弄誤墮不  
潔以比士君子之墮行嗚呼卮也而弄諸小兒何待其  
旣汙而後咨嗟太息哉賦曰天下之寶任之匪人旣汙  
而悲其過實未毀而喪其真故球圖不可玩之以婦寺  
而大阿不可假之於童昏唐花賦序云南方審花牡丹  
爲盛北方地寒梅亦不花花者皆唐花也早開而無香

且易悴賦曰泉之竅於山也人鑿其胚玉之蟄於璞也  
人斲其胎花之孕於根也人發其菱吁此人之所以戕  
物而物之所以甯處於不材二賦寥寥數語而卽小見  
大含孕無窮名作也

周孟侯先生

吾邑周孟侯先生拱辰明季貢生吾母之七世祖也先  
世累著清德母夫人夢硯生花而生公比長聰穎絕人  
又勵志於學嘗坐小樓去梯三年讀古今文五千篇有  
奇由是才藻豔發名噪一時吳興莊廷鉞將刊明史以

厚幣聘公先一夕公夢其父界以一合啓視之則赫然  
一人頭也驚而寤適莊使至有警於是夢峻辭卻之及  
明史禍發諸名士株連被戮者多公獨脫然無累識者  
謂世德之報屢不得志於有司牢騷抑塞之氣悉寓於  
文辭著有聖雨齋集其宮詞八十首寄興無端尤足令  
才子讀之同聲感喟摘錄五首以當管鼎一嚮露痕高  
漾月痕低六院笙歌五院迷莫道襄王惜香夢巫山只  
在畫欄西垂楊深閉畫樓春花送黃昏鶯送晨三十六  
宮閒似水平明催召號夫人金鈴猶踏落花泥輦路苔



痕旋欲迷誰道舉頭剛見日鳳樓疑在十洲西碧簫吹  
破思依依聽盡宮鶯半掩扉最是無聊看不得桃花片  
片背儂飛翠鬢寶鬢玉膏新一對菱花一愴神每恨蛾  
眉綠如許不如影裏李夫人

### 新樂府

山陰胡茨村觀察介祉取明崇禎宏光時事作新樂府  
六十篇篇各有記載述甚詳願往往有與正史異者如  
諸公子篇謂魏大中子學濂官庶常汙甲申僞命而略  
其死事一節東江歎篇謂毛文龍盛時侵貂書幣走津

要如織陳繼儒負盛名方游輦下獨不及心銜之甚適  
於錢龍錫座談東江事言毛跋扈僭越當斬狀錢因以  
語袁禍釀於微細而中於封疆橫議之罪真不容誅不  
知此乃妄傳未可據以爲實盧家軍篇謂象昇率親兵  
赴戰行至賈莊遇刺死而明史則紀其戰死蒿水橋事  
甚悉三罪輔篇謂誤國之罪以溫體仁薛國觀周延儒  
爲稱首楊嗣昌實心任事才又足以濟之帝知之甚深  
故眷倚獨重使廷臣不以門戶掣肘俾得盡心辦賊未  
必無成顧攻者紛紛遂使憂危憤鬱方寸擾亂以抵敗

亡此說尤爲失真余觀明史本傳崇禎時先後增賦糜餉嗣昌主之實爲禍本復庇熊文燦以撫賊誤國厥罪甚大又陷虜象昇戰死惡方孔炤劾下詔獄抑孫傳庭使不得遂其志而賊勢益張嫉忮之私視體仁等亦無甚異謂之實心任事不可也悲潼關篇謂孫傳庭死於亂兵而明史則謂其躍馬大呼而歿於陣假皇后篇謂或言初福王世子歿德昌郡王序當嗣位馬士英爲鳳督有以居民藏王印首者取觀則福王印也詢其人云負博進者持以質錢士英物色之則以爲真嗣福王矣

國變後遂推戴以邀授立功天下皆以爲嗣福王卽皇帝位矣彼童氏以爲今嗣福王卽昔之德昌王而抑知呂之德昌王非今之卽皇帝位者耶故有斷斷不可見者按此說亦正史所損不足信也其所爲樂府惟悲潼關一篇音節近古云潼關天下險大督將家才一戰王師沒三秦賊騎來河流終古恨風雨至今哀白日行當墮揮戈力豈回

孫愈愚

烏程孫愈愚明經夔刻苦於學耽吟詠尤工爲古文辭

嘗與震澤張淵甫學博履書曰文章之道一真氣所彌  
綸自時文興而士安於剽竊摹擬之習去而習古文亦  
同此伎倆安得不僞究之天下惟真者爲能感人於無  
窮而僞者祇可欺一時之目自古文文章傳真而不傳僞  
故讀書不必多而要在通其意抒辭不必麗而要在達  
其心云云又嘗選歐陽永叔蘇老泉東坡曾子固劉原  
父李太伯之文各數十篇朝夕諷誦而不取王介甫惡  
其辨言亂政也

吳香園詩

吾里吳香圃茂才全昌歸安人少有雋才稍長以詩賦  
受知於學使者阮文達公入郡庠屢試不售輒軻憔悴  
以老著有香草齋詩鈔西溪云采藥西溪行寒流曲如  
帶日落牛羊歸邨墟暝烟外寄俞生香儼云漂零萍梗  
又經秋此夕思君獨倚樓寒雁一行何處去白雲天遠  
大江流又斷句云殘年衰髯客獨夜大江船落日樹邊  
盡孤舟溪上歸樓頭細雨三更笛江上寒潮一葉舟小  
溪疎柳誰家閣極浦斜陽獨客舟久病人如秋樹瘦苦  
吟聲比夜蟬寒皆清逸可諷

關帝謚

關帝謚壯繆人皆謂繆非美稱獨綿竹黃州牧成章持  
論辨之云昔關帝之謚壯繆也陳壽以謚法名與實爽  
曰繆傳謂帝剛而自用戾以致敗也又或謂武功不成  
曰繆千載下卒無一人爲帝表暴者而不知皆非也按  
禮記大傳以序昭穆古本作繆左傳穆多作繆若秦穆  
公史皆稱繆是穆與繆古文多通用考謚法布德執義  
曰穆中情見貌曰穆夫布德執義中情見貌孰有過於  
帝者謚曰壯繆蓋傷帝之死國與宋岳飛謚武穆同意

壯穆作繆亦猶秦穆魯穆之或作繆也今世俗以繆  
爲橫戾之繆以爲惡謚而諱之非情事也黃之論如此  
余以爲秦繆之謚昔人嘗以爲非美名矣黃說雖辨終  
不能舉歷久相沿者而易之也伏讀乾隆四十一年七  
月

上諭關帝在當時力扶炎漢志節凜然乃史書所謚並  
非嘉名陳壽於蜀漢有嫌所撰三國志多存私見遂不  
爲之論定豈得爲公從前

世祖章皇帝曾降旨封爲忠義神武大帝以褒揚盛烈



朕復於三十二年降旨加靈佑二字用示尊崇夫以神  
之義烈忠誠海內咸知敬祀而正史猶存舊謚隱寓譏  
評非所以傳信萬世也今當鈔錄四庫全書不可相沿  
陋習所有志內關帝之謚應改爲忠義第本傳相沿已  
久民間所行必廣難於更易着交武英殿將此旨刊載  
傳末用垂久遠其官板及內府陳設書籍並著改刊此  
旨一體增入欽此

聖謨煌煌洵足彰聖神之德而垂示萬古矣

劉三山

廣州劉三山孝廉華東志行高潔洋商某資緣入鄉賢祠三山力持清議忤大吏意褫爲布衣士論惜之仁和周南卿茂才三燮贈以詩云天柱風雲事可嗟閒身且伴鐵梅花

三山姬人  
名鐵梅

富人名青揚雄載自把文章弔白

沙

### 沈鹿坪師

歸安沈鹿坪師焯家練市鎮少好學夏夜同人皆散步納涼獨默誦所習經常達旦不輟屢試高等每一藝出人皆傳誦時俗學以剽竊塗飾爲能矯其弊者又貌爲

高古不中有司程度公折衷至當探經書之蘊而出以  
高華究理法之精而歸於沈實以故游其門者大小試  
無不利公精於數學乾隆丙午舉秋試後杜門授徒不  
與計偕人勸之就試公曰吾當於乙卯歲獲售今猶未  
也屆期果以二甲第八名登第先是有顯官私人榜後  
通欵於公謂詞林可得公力卻之旣而以知縣歸班改  
就教職補官台郡學博台於前明科甲極盛人才輩出  
今則稍稍衰矣公曰振興文教乃吾責也遂進多士而  
勸之以學遠近嚮慕登堂負笈者踵相接公視其質之

高下循循善誘數年之後文風漸復嘉慶己卯引疾歸  
館於青鎮嚴比玉太守延居家余亦親受業焉公閱余  
文謂曰子作文無根柢猶欲築室而無土木也安得成  
余於是始知殫力於經後得忝竊科名皆公之力也公  
生平所作制藝不下數千首詩古文詞亦通整有法惜  
皆散佚茲錄篋中所存詩三首於後留別嚴比玉珮仙  
詩云桃李春深苜蓿肥偶傷懷抱拂衣歸時有喪  
明之痛儒官  
久忝齊竽濫學術終慙鄭璞非忽枉新鶯求友喚故教  
秋燕傍人飛頻年坐擁談經席擬返衡茅晝掩扉話到

衷腸首重回沈吟且盡手中杯曾聞良玉燒須試漫道  
黃金散復來循吏聲名多郡秩贊郎詞賦總仙才不辭  
臨別將言贈記取荆花一處栽題李梅修撫心圖詩云  
子輿日三省伯起夜四知古人貴慎獨炯若鑒在茲勞  
勞方寸地旦夕輪轅馳暗室虛無人想見肺肝時勿問  
馬得失勿問蛙公私中有丹元子俯首將何辭君家見  
聞錄言行皆人師繪圖藉自儆囑我系以詩我亦問心  
者前任台監理廟工楹帖有撫此重致思致思且勿語  
事可問心甯任怨之句語恐旁人嗤

臘

月令臘先祖五祀正義云臘者獵也謂獵取禽獸以祭先祖五祀也然則伏獵侍郎亦非甚謬未若金根車之改金銀車也特其人不學遂貽日實且古人作書可以通假後世則不能耳近有士子試藝誤書非爲飛而被黜此字古亦有通用者矣

起復

宋劉琪爲江西安撫繼母憂起復琪曰三年通喪三代未之有改漢儒乃有金革無避之說已爲先王罪人今

邊陲幸無犬吠之驚臣乃欲冒金革之名以私利祿之  
實不又爲漢儒之罪人乎丞相史嵩之丁父憂起復徐  
元杰言家庭之變哀戚終事禮制有常何至忽送死之  
大事輕出以犯清議哉自聞大臣有起復之命雖未知  
其避就若何凡有父母之心者莫不失聲涕零臣特爲  
陛下愛惜民彝爲大臣愛惜名節而已其論起復之失  
最爲懇至讀此覺明吳中行諸人論張江陵奪情意激  
而辭煩猶未能得其要也

仁和葉素菴孝廉金書才華富贍工書畫善吟詠家貧  
鬻文京師以養親中年殂謝士林惜之嘗贈余扇頭墨  
梅題詩一絕云風雪漫天臘正殘一枝素萼獨凌寒拈  
毫寫出清癯骨未許人間俗眼看今已爲友人攜去每  
誦遺什輒爲惘然

端木舍人

青田端木鶴田舍人國瑚天才穎異以詩賦受知於阮  
文達公官歸安學博十餘年後以精究地理爲禮尙書  
恩所薦萬年吉地工成



特賜中書加六品銜持品高介絕俗在京師不事干謁  
蕭然斗室惟以著述自娛相國某慕其名招之不往以  
此浮沈冷宦不得遷擢而卒所著有易指地理元文太  
鶴山人詩集在歸安學舍作云官閣焚香過十年烏皮  
尙戀舊青氍日長散帙無公事睡起匡牀有俸錢百代  
看成燈下燼一鄉逃入酒中天玉河東畔蓮莊北聽唱  
漁歌月又圓寄園紫藤精舍作云朝隱頻年未放還寄  
園今寄我清閒看花西寺逢三市土地廟每三日花市與寄園止隔一牆  
視草東垣隔八班每八日一詣中書直廬官悟茶香人短榻佛燈

書味夜空山

中供觀音佛龕

紫藤老惜生涯薄每倚春風借酒

顏寄興閒遠讀之可想見其爲人斷句如哭林西溪云

山川如故徒埋骨天地無情莫著書寄太鶴山房云文章事大愁言命仕宦途多幸息心淮安作云城根驛路藏秋草樹杪河聲走夕陽出儀真青山頭江口云潮生城郭添新渡木落江湖出遠帆落葉云風高古屋秋如雨月滿空山夜已霜黃浦舟夜云一行楊柳烟爲岸四面蘆花水是天淮陰弔韓信云一代英雄兒女手百年恩怨布衣時鱖魚云四月如銀宜貴客一生多刺比風

人皆擺脫凡近憂髮生新所作聯語亦可誦挽温州林石筍云氣絕淩雲他日豈遺司馬稿淚傾流水此時先碎伯牙琴挽朱雨亭云愁寄天邊子始成名身易簪衰傳日下父終遺命世傳經

孔子生日

上元葉健菴中丞守興安府時郡諸生以八月二十七日爲孔子誕辰稟請赴廟行禮公爲辨示止之謂嗣後諸生不得復爲此舉倘各塾師生以終歲讀孔子書不可無以申敬應於春秋祭丁日各於私塾行釋菜禮似

爲得禮之正卽陋俗相沿必欲於八月二十七日展其誠敬亦祇謂之釋菜則可謂之祝壽則不可其俗稱謂孔子會則尤不可云云余按禮部則例載八月二十七日恭遇

先師誕辰

大內至王公百官均致齋一日各衙門不理刑名民間禁止屠宰前期繕綠頭牌具奏得

旨並出示九門及禮部前是孔子誕辰之期已垂功令有官職者屆期均應致祭興安府諸生稟請行禮似

不得訾爲陋俗惟不應用便服且有祝壽及孔子會等稱耳

孫瀛帆詩一

仁和孫瀛帆茂才光裕博學能文中年棄帖括爲申韓家學暇則恣力於詩才藻豔發傾倒一時道光癸卯客台郡滋陽張蘭臺太守庭樺幕中一見如故遂訂交焉以所著樹蕺草堂詩鈔見示佳句如南山古寺題壁云落花滿徑鳥啼寺斜日半肩僧上樓箴作詩者云花到半開香正好酒經重釀味逾醇尤長於樂府道光辛丑

壬寅間嘆夷擾浙會賦從軍詠十章激昂悲壯於行間  
情事描寫曲盡可稱詩史茲錄其二乍川戌云塘繞當  
湖環乍浦浙西重鎮堵門戶都護防城擊枹鼓東指舟  
山鬱風雨帆檣出沒無定所健兒橫戈吼如虎氣壓驚  
濤吞醜虜一旦沿塘集樓櫓礮火轟天飛猛炬棄甲曳  
兵擲弓弩抱頭紛竄虎如鼠官兵散賊兵聚官兵爲客  
賊兵主主人移居讓客處主人未歸客亦去往不迫兮  
來不拒君不見乍川戌昔時重鎮今曠土朝廷養士二  
百年後先奔走曰禦侮杉青牓云駕湖水草黏天碧杉

青牖口苦蘇齧牖外屯軍幻塵劫草染鵲紅水鳴咽乍  
川失守寇氛邇鶴唳風聲禁不止居民聞警紛避徙樹  
竿之徒乘亂起將軍下令誅漢奸殺人如草多株連甘  
涼健兒勢洶湧遇敵則怯遇民勇摩厲以須逢狹路爾  
來好送頭顧去奸民狡黠良民懦奸民漏網良民誅將  
軍非嗜殺健兒豈盡誣與其失不經甯殺不辜縱殺不  
辜休怨予芳蘭尚以當門鋤況犯虎威將虎鬚屍累累  
血濡濡烏鳶啄肉委路隅亡何有鄉名子虛一邱之貉  
誰賢愚吁嗟乎將軍令司馬法昨日誅某乙今日戮某

甲簿錄雖分明猶慮有冤脅奈何羅羅雉不及呼名鴨  
黠鬼無名鬼亦愁模糊夜哭杉青牖

禱神文

錢塘陳雲伯大令文述宰江都日江水漲淹田廬民不  
得棲食因齋戒爲文禱於禹廟及江海祠曰念小民之  
或忘帝力實出無知譬人子之偶拂親心定容悔過道  
路傳誦以爲名言

獄獄

蕭山汪龍莊大令輝祖由名幕而爲循吏所著學治臆



說佐治藥言已風行海內所有獄獄之辭畧誌於此無  
錫縣民浦四童養妻王氏與四叔經私事發依服制當  
擬軍注以凡上常州府引服制駁注議曰服制由夫而  
推王氏童養未婚夫婦之名未定不能旁推夫叔也臬  
司以王氏呼浦四之父爲翁翁之弟是爲叔翁又駁注  
曰翁者對婦之稱王氏尙未爲婦則浦四之父亦未爲  
翁其呼以翁者沿鄉例分尊年長之通稱乃翁嫗之翁  
非翁姑之翁也撫軍因王氏爲四妻而童養於浦如以  
凡論則於四無所聯屬議曰童養之妻虛名也王習呼

四爲兄四呼爲妹稱以兄妹則不得科以夫婦四不得爲夫則四叔不得爲叔翁撫軍以名分有關又駁議曰禮未廟見之婦而死歸葬於女氏之黨以未成婦也今王未廟見婦尙未成且記曰附從輕言附人之舉以輕爲比書云臯疑惟輕婦而童養疑於近婦如以王已入浦門與凡有間比凡稍重則可科以服制與從輕之義未符况設有重於姦者亦與成婚等論則出入大矣請從重枷號三箇月王歸母族而令經爲四別娶似非輕縱遂得批允江淮衛漕船多滿十年糧道發價改造其

間有停運三次二次者戶部以未滿十運駁取擅動庫  
項職名司錢穀者援例頂詳總漕不准商之汪汪曰援  
十年之例而部以十運爲計創也非破其十運不可乃  
爲之議曰截留漕船以裕民食破格之恩前所希有是  
以向來止計十年而不扣足運但船隻一項利於行駛  
不利停泊蓋一經停運久泊河干上之日曬雨淋猶有  
苫蓋銀兩時爲檢點至船底版片泥膠苔結日漸朽損  
若因船身無恙勉強起運重載米石遠涉江黃設有疏  
虞所關非細故不敢因慎重錢糧致誤

天庾正供既滿十年不得不造議上總漕大爲許可達  
部允行長洲縣婦周張氏年十九而孀遺腹子繼郎十  
八歲將授室而殤族以繼郎未娶欲爲張之夫繼子而  
張欲爲繼立嗣輾轉訐訟前令皆批房族公議歷十八  
年未結因查全卷知乾隆十九年前張指一人可以立  
孫而房族謂其甫離襁褓未必成人後又另議終至宕  
延狂擬批張撫遺腹繼郎至於垂婚而死其傷心追痛  
必倍尋常如不爲立嗣則繼郎終絕十八年撫育苦衷  
竟歸烏有欲爲立嗣實近人情族謂繼郎未娶嗣子無

母天下無無母之兒此語未見經典爲殤後者以其服服之禮有明文殤果無繼誰爲之後律所未備可通於禮與其絕殤而傷慈母之心何如繼殤以全貞婦之志乾隆十九年張氏欲繼之孫現在則年已十六昭穆相當即可定議何必彼此互爭紛繁案牘因立繼書遵依完案烏程縣馮氏因本宗無可序繼自撫姑孫爲後比卒同姓不宗之馮氏出而爭繼汪議據宋儒陳氏北溪字義系重同宗同姓不宗卽與異姓無殊之說絕其爭

端

## 孔孟弟子

孔子弟子自稱名孟子弟子如萬章咸邱蒙有自稱吾者孔子弟子稱孔子曰子孟子弟子稱孟子曰夫子孔子弟子問仁者七問孝者三問政者六而孟子弟子所問皆不及此正不獨孔子之稱弟子以名孟子之稱弟子曰子可徵其隨世變而異也

## 名與姓通

通鑑五代後漢有虢州伶人靖邊庭胡身之注曰靖姓也優伶之名與姓通取一義所以爲諱也日知錄云考

之自唐以來如黃幡綽雲朝霞鏡新磨羅衣輕之輩皆  
載之史書益信其言之有據嗟乎以士大夫而效伶人  
之命名則自嘉靖以來然矣余觀士大夫命名連姓爲  
義唐宋已然如李無言魏嗣萬程九萬王佐才安如山  
凌萬頃之類明初亦間有之如凌雲翰成始終夏時正  
傅汝舟傅汝楫之類惟至嘉靖以後而始盛耳

### 嗣征

宋吳氏仁傑兩漢刊誤補遺辨證精核其論義和主坡  
公義和忠於夏之說謂嗣征作於夏之史官故其本序

稱嗣后承王命徂征此欺天下後世之辭如司馬氏討諸葛誕而假魏帝詔以爲恭行天罰也孔子序言允征往征之此所以正羿專命之罪如春秋一字之貶也不知旣出於羿之史官爲欺天下後世之辭孔子何以列之經且義和旣忠於夏序何不言及之而惟云義和涸澠廢時亂日耶

### 同姓名同字

古今同姓名者不可勝數同姓名同字余所知者僅有三耳典籍所載恐尙不止此數漫識之以俟續補王承



字安期一晉人湛子一梁人儉孫陳子張先字子野一  
宋天聖二年進士開封人仕至知亳州鹿邑縣年四十  
八歐陽公爲作墓誌銘一宋天聖八年進士烏程人仕  
至都官郎中年至八十餘能爲詩及樂府號張三影歐  
陽公稱爲桃李嫁東風郎中陳鳳字羽伯一上元人嘉  
靖乙未進士累官陝西參議一無錫人嘉靖時布衣

文體相似

韓文公作樊紹述墓誌銘卽似樊之奇特歐陽公作尹  
師魯墓誌銘卽似尹之文簡而意深羅鄂州作爾雅翼

序用韻王伯厚朱景濂序亦皆用韻蓋惟才力足以相敵故卽能用其體也

有澹臺滅明者

武進士億經讀考異論語曰有澹臺滅明者謂近讀多以有字連下爲句攷此宜以有字爲讀蓋對師問而應曰有也與孟子不動心有道乎曰有北宮黝之養勇也亦以有字句絕北宮黝屬下語勢正同余按孟子有字句絕凡四交隣國有道乎賢者亦有此樂乎不動心有道乎然則有同與問答皆以有字相應此處上下文法

不同似以有字連下讀爲是

七修類彙

郎瑛七修類彙謂李商隱莫謝逸詩句又以西臺爲南唐李建中王阮亭香祖筆記曾訾其誤以余觀之疵謬尙不止此如隱語昉於左傳麥麴山芎藭之喻而以爲起自東方朔口無毛聲瞽瞍亢益高南道主人見魏書裴延儒傳而以爲始於唐鄭餘慶親家翁見隋書房陵王勇傳而以爲始於五代李愚誚馮道謂今之祭物衆矣名亦工文備述黍曰薌合數語而不知其出於曲禮

謂表德用甫字起自王荆公而不知後漢書已有之如  
袁閎字夏甫杜密字周甫葛龔字元甫之類是也謂點  
心始於能改齋漫錄而不知本於唐書鄭僊傳吳氏特  
引其語耳謂趙明誠爲清獻公中子是誤以正夫爲閎  
道也謂劉健今尙在年已一百七而考之明史則云卒  
於嘉靖五年年九十四其他謬誤尙多未遑悉正也

### 經史數見字

經史各有數見之字周易也字尙書哉字詩經兮字左  
傳將字故字史記漢書乃字南史便字深字新唐書臣

字

一言

一言有作一句解者一言以蔽之一言可以興邦是也  
有作一字解者一言可以終身行之是也又六言六蔽  
之言亦作字字解後世詩家所云四言五言七言殆昉  
於此

銀頂

道光戊子年言官奏請改正服色以混戴金頂者甚衆  
飭令遵例惟七品官及進士舉人得戴素金頂八九品

官及貢生戴起花金頂生監戴銀頂一時購頂更易肆  
中賴以獲利寒士皆購錫頂代之肆工雜之以鉛歷時  
未久色卽黯黑有力者以銀鑄實心頂約重一兩許加  
以磨琢望之與六品硃礪頂無異往往於酒筵酣飲之  
時爲人竊去行之年餘仍沿舊習間有守法之儒猶戴  
銀頂則羣譁笑之甚矣習俗之難更也

俗稱

今之稱謂有與古相反者如爾雅謂妻之昆弟爲甥而  
今則稱爲舅矣儀禮舅之子稱內兄弟而今則稱爲表

兄弟矣此猶有所本也至如稱五世祖爲太高祖或稱

高高祖稱父之舅爲舅祖

當稱大舅見後漢書張禹傳又稱祖舅見晉書應詹傳南

史袁象傳

稱從母爲姨母稱姑爲姑母稱姑夫爲姑父或稱

姑丈稱妻父爲岳父稱姁爲伯兄稱弟之妻爲弟婦皆習俗沿訛不可以入文辭若稱舅氏爲舅父則史記已有之稱外舅爲丈人外姑爲文母則柳子厚文已有之

### 帥中丞

黃梅帥仙舟中丞承瀛撫浙有惠政乞歸後以公餘銀四萬兩發商生息永爲濟湖之資胡書農學士賦詩紀

之有聞道歸無半頃田爲民留費歲三千之句

黃少司馬

昆明黃少司馬琮道光丙戌館選戊申歲以父母年躋  
大耋陳請歸養其奏牘有云八千里外高堂之夢想時  
殷十五年來一日之瞻依未遂白雲徒望遙隔鄉關清  
夜自思難安寢饋情辭懇摯不必以設色爲工

小軍機

紀文達公性喜詠諧嘗作京官詩數十首傳誦一時猶  
記其小軍機一律云對表雙鬢報丑初披衣懶起倩人



扶圖爐侍妾翻貂挂啟匣嬌僮理數珠流水是車龍是  
馬主人如虎僕如狐昂然直入軍機處低問中堂到也  
無有京官不願外遷觀察而老於京卿貧病而死者公  
戲輓之云道不遠人人遠道卿須憐我我憐卿

李方作

嘉定李許齋方伯廣芸少時孤貧力學鄉會試

乾隆丙午庚戌

皆以經策受知於大興朱文正公珪會試幾得元以律  
句用毛詩二字未安抑第六因賦詩云泥金報去人皆  
後淡墨書來我最先蓋填榜從第六名起五魁後入也

又殿試後賦紀 恩詩云待詔齊來金馬門賢良策  
進 帝親掄桀壇將以爲皆得揚解人真勵有存鼎足  
三分須有福奎躔五緯已承 恩孫山名第非容易頻  
占前茅感可言鄉試第四李以縣令涖官浙江卓著循  
聲淳樸閩藩潔清自矢以効僚屬爲其誣訐大府素忌  
李之公正必欲周內其事質訊時肆意脅侮李不能堪  
遂自裁奏入

上震怒遣二星使實勘閩人合詞訟冤事得自主其獄  
者皆得版譴閩人快之

紅豆

吳蘭次太守詞云把酒祝春風、雙紅豆有毘陵女  
子日誦之以爲秦七黃九復生時號紅豆詞人長洲惠  
硯谿大令周惕居近吳郡東禪寺寺有紅豆樹移一枝  
植階前自號紅豆主人會稽王笠舫大令衍梅賦紅豆  
詩云故園酒祝吳林蕙別浦人祠惠半農半農乃硯谿  
之子士奇著  
有紅豆齋小草鄉人因  
其齋名稱紅豆先生  
蓋用  
本朝典也

楊拙園先生

歸安楊拙園先生知新績學能文屢困闈試讀書益力  
好周顓貧乏家以中落後長子蕉雨觀察炳堃出宰中  
州祿入稍裕好施益甚著有夙好齋詩鈔句如晚登南  
城云落日在高樹平蕪生夕烟初秋登望松臺云江山  
留故蹟天地入新秋送姚千之云桃花柳絮隨孤棹流  
水青山入遠村秋闈報罷云世事分明論成敗人情頃  
刻變炎涼春初由豫抵家云千里雲山迂客路一天風  
雪送歸人皆足嗣響唐人

改姓

姓有去字之偏傍而改者鄒之爲曾由來遠矣王莽末  
疏廣孫孟遠避難去疎之足而爲束王審知據閩時人  
避其諱去沈之水而爲尤文彥博先世本敬氏以避諱  
改金履祥先世姓劉避吳越諱而改黃子澄死靖難平  
易其姓爲田名經魏忠賢時魏氏有去鬼而爲委者又  
如熊爲能慎爲真敬爲苟謝爲射之類不可悉舉

### 梁元帝

梁元帝於甲戌歲被害年四十七所著金樓子自言於  
丙申歲婚則是年方九歲耳何其早也又言余年十四

苦眼疾沈痼比來轉暗不復能自讀書三十六年來恒  
令左右唱之計自年十四迄於末年未及三十六之數  
疑必有誤

一日不見如三月兮

一日不見如三月兮采葛詠之見譏謗交構之際猶不  
忘君也讀之可以怨于衿詠之見學業衰廢之時尤亟  
須友也讀之可以羣

梳銘

明詩綜七十一卷項真名下靜志居詩話云予嘗見其

爲閨人銘梳奩曰人之有髮旦旦思理有身有心奚不  
如是筆法極其飛舞繹其語殆亦非真狂生也予按銘  
乃盧仝所作見唐文粹云人之有髮分旦旦思理有身  
兮有心兮胡不如是項蓋減易其字而書之耳

### 舒元興銘

舒元興玉筍篆志論李斯李陽冰之書曰斯去千年冰  
生唐時冰復去矣後來者誰後千年有人誰能待之後  
千年無人篆止於斯嗚呼主人爲吾寶之容齋隨筆稱  
之以爲有不可名言之妙余按元興所作陶母墳版文

銘語亦簡妙彭蠡之濱峨峨高墳有晉陶君哲太夫人  
前瞻千年卜孟爲鄰後千萬年卜誰爲鄰西江悠悠東  
湖滔滔彭蠡有竭斯墳更高

印章隱姓名

有於印章隱姓名者如姜白石夔之鷹揚周室鳳儀虞  
廷乃運典格也徐文長渭之秦田水月乃拆字格也蓋  
昉於辛稼軒六十一上人印文

張睢陽廟聯

台州巾子山張睢陽廟屢著靈應郡人奉祀甚虔楹聯



云慷慨誓師守睢陽  
蕞爾之區孤城中人皆樂死從容  
盡節振河北英雄之氣千載後貌尚如生  
運意精湛又云保障在江淮業肇中與正史論功先郭李輝光齊日月心明大義孤城著節邁顏盧語亦圓穩

### 巢居閣

祠宇楹聯往往工拙互雜獨西湖巢居閣聯語皆可傳  
誦祠傍水仙王北宋尚留高士躡樹成香雪海西湖重  
見古時春

陳若霖

梅鶴寄高閒遺稿千秋笑司馬湖山

寫清冷寒泉一掬拜坡仙

朱上林

華表千年遺蛻可聞

元鶴語孤山一角暗香先返玉梅魂

吳廷琛

山冷好教

梅似續巢新應有鶴歸來

方應綸

### 琴銘

浦城祝桐君司馬鳳喈精琴理以前人琴譜闡發未詳  
著琴譜四卷蓄一琴名秋聲其自題曰嘉慶戊寅予始  
學操縵於伯兄秋齋先生庚辰姊夫詹正齋贈是琴材  
質古厚而漆剝音攸置之有年嗣稍識琴理因悟修斲  
之法道光辛卯予自治之伯兄爲題秋聲二字以雅器  
復完其音清實也咸豐辛亥五月兄遽謝世明年夏予

馳驅吳越燕魯攜是琴行撫之感愴爰題辭曰惟石之  
品桐生巖孤高適性枝剛堅斲之爲琴歷長年氣與質  
渾木液竭鏗然發音疏以越抑兮實汎兮清秋聲移情  
永襄伯兄甲寅七月旣望鳳階換屬余爲之銘曰斲之  
補之質完善撫焉調焉韻清遠山遙水紆息游與俱萬  
慮滌除悠然古初揮絃正譜持特識四海知音未易得  
言念同氣意何極

沈氏姑

沈氏姑蕙心德性幽閑大母施太恭人最愛之少嫻吟

詠詩格清新姑夫沈虛舟咸孚爲歸安名士結褵未久  
卽得癘疾姑遂絕口不吟詩幼時所作亦深自諱匿不  
以示人余請之再三始得見之詠松云瘦石寒梅其結  
隣亭亭不改四時春須知傲雪凌霜質不是繁華隊裏  
身秋日閒居云翠幙初寒小閣幽茶烟裊裊拂簾鉤一  
庭秋色堪吟賞底事詩人慣說愁秋夜云細雨初收爽  
氣浮香飄桂樹露華秋姮娥也愛窺書史先遣清光入  
小樓

學林

王觀國學林謂漢晉以來卑者呼尊者爲足下平交相呼亦以足下今自高而侮人則曰足下而稱尊者爲座下几下席下閣下又何耶不宣不具不備不次其義一也今平交用不宣尊者與卑者用不具卑幼與父母尊長則稱不備而居喪則用不次頓首稽首叩首其爲恭敬之禮則同也今居父喪者用叩首母喪者用叩頭又何謂耶此皆出於近世吉凶書儀世俗不攷其是否而咸遵用之間其義則不能別也此亦徇俗之太過也余接近世尊與卑曰足下稱尊者曰閣下而無座下几下

席下等稱不宜不備不具大畧與宋時相同惟不次米  
簪專用於居喪又如不旣不盡不戢不悉不一皆與不  
宜並用至於居父母之喪則概用稽首此皆了無取義  
而習尚相沿卽通人亦莫能易殆所謂禮從宜者歟

### 七夕詩

餘杭陳煒卿女史爾士錢新梧給諫之室也習經史工  
吟詠賦七夕詩命意最高梧桐金井露華秋瓜果聊因  
餽物酬卻語中庭小兒女人間何事可干求

### 日疾秘方

患目赤者小便時以指蘸入目中閉目俟其白乾日三四次卽愈惟當淨洗手面以免不潔之咎此方載醫學綱目他書不恆見屢試屢驗秘方也又石室秘錄治目中初起星用白蒺藜三錢水煎洗之日四五次星卽退此方亦神效

吐生

泊宅編謂天地之間有吐而生子者鷓鴣兔凡三物按蟾蜍亦吐生見埤雅